



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 288, Datë 13.11.2025

MBI

**FILLIMIN E PROCEDURËS PËR RISHIKIMIN E VENDIMIT TË BORDIT TË ERE-S
NR. 197, DATË 15.08.2025 “MBI LICENCIMIN E SHOQËRISË “KËLCYRA 2020”
SH.P.K. NË VEPRIMTARINË E PRODHIMIT TË ENERGJISË ELEKTRIKE NGA
HEC “KLISYRË”, ME KAPACITET PRODHUES 2 MW”**

Në mbështetje të nenit 16 të ligjit nr. 43/2015 “Për sektorin e energjisë elektrike”, i ndryshuar; neneve, 77-89 dhe 113 ligjit nr. 44/2015 “Kodi i Procedurave Administrative i Republikës së Shqipërisë”; si dhe nenit 15 të Rregullores për organizimin, funksionimin dhe procedurat e E R E-s, miratuar me vendimin e bordit të Entit Rregullator të Energjisë (ERE) nr. 96, datë 17.06.2016; Bordi i ERE-s, në mbledhjen e tij të datës 13.11.2025, mbasi shqyrtoi relacionin me nr. 2038/17 prot., datë 11.11.2025, të drejtorive tenike të ERE-s “Mbi rishikimin e vendimit të bordit të ERE-s 197, datë 15.08.2025 “Mbi licencimin e shoqërisë “KËLCYRA 2020” sh.p.k. në veprimtarinë e prodhimit të energjisë elektrike nga HEC “Klisyrë”, me kapacitet prodhues 2 MW””,

Konstatohet se:

- Bordi i ERE-s, me vendimin nr. 152, datë 17.07.2025 vendosi të fillojë procedurën për licencimin e shoqërisë “KËLCYRA 2020” sh.p.k. në veprimtarinë e prodhimit të energjisë elektrike nga HEC “Klisyrë”, me kapacitet prodhues 2 MW, me vendndodhje në Zonën Kadastrale 2170, nr. pasurie 1071, Klisyrë, Tropojë. Ky vendim i është njoftuar Ministrisë së Infrastrukturës dhe Energjisë (MIE) me shkresën nr. 2038/4 prot, datë 23.07.2025.
- Në vijim të plotësimit të dokumentacionit/informacionit të kërkuar nga ana e shoqërisë dhe në rrethanat që nga ana e MIE-s nuk ka pasur ndonjë kthim përgjigjeje, me vendimin nr. 197, datë 15.08.2025, bordi i ERE-s vendosi:
 1. Të licencojë shoqërinë “KËLCYRA 2020” sh.p.k. në veprimtarinë e prodhimit të energjisë elektrike nga HEC “Klisyrë”, me kapacitet prodhues 2 MW, me vendndodhje në Zonën Kadastrale 2170, nr. pasurie 1071, Klisyrë, Tropojë, për një afat 30-vjeçar.
 2. Përpara fillimit të operimit, shoqëria duhet të depozitojë në ERE lejen e përdorimit të burimit ujor për prodhimin e energjisë elektrike nga HEC “Klisyrë”, për kapacitetin 2 MW.
 3. Shoqëria duhet të dokumentojë në ERE ndërtimin dhe vënien në punë të HEC-it brenda datës 31.12.2025.
 4. Me fillimin e operimit, por jo më vonë se 60 (gjashtëdhjetë) ditë nga ky fakt, shoqëria duhet të dokumentojë në ERE testimin e veprës.
 5. Brenda datës 01.01.2026, shoqëria duhet të depozitojë marrëveshjen e rinovuar për shërbimet e kontabilitetit.

6. *Ky vendim është objekt rishikimi, në rast të plotësimit/mosplotësimit të kushteve të pikave 2, 3, 4 dhe 5 të këtij vendimi dhe në rast të depozitimit të akteve të ndryshme nga ato që kanë shërbyer për marrjen e këtij vendimi.*

- Ky vendim i është njoftuar shoqërisë nëpërmjet shkresës nr. 2038/9 prot., datë 18.18.2025, dhe palëve të interesit nëpërmjet shkresës nr. 2038/11 prot., datë 20.08.2025.
- Në të njëjtën ditë, në ERE është administruar shkresa e MIE-s nr. 5331/1 prot., datë 19.08.2025, protokolluar në ERE me nr. 2038/10 prot., datë 20.08.2025, me anë të të cilës, MIE ka bërë me dije se shoqëria “Këlcyra 2020” sh.p.k. i është drejtuar asaj me shkresën e datës 21.03.2025, me kërkesën për pajisje me faturën e pagesës referuar VKM nr. 822/2025, e ndryshuar, me qëllim marrjen e miratimit përfundimtar për zgjerimin e kapaciteti të hidrocentralit ekzistues Këlsyrë, i privatizuar nga ana e saj. Në përgjigje të kësaj kërkesë, MIE njofton se me shkresën e saj nr. 2462/1 prot., datë 24.04.2025, i ka bërë me dije shoqërisë se, me ligjin nr. 61/2020 “Për disa ndryshime dhe shtesa në ligjin nr. 43/2015 “Për sektorin e energjisë elektrike”, të ndryshuar”, në pikën 2 të nenit 49 të ligjit nr. 43/2015, është përcaktuar se miratimi për ndërtimin e kapaciteteve prodhuese të energjisë bëhet nëpërmjet një procesi konkurrues, sipas përcaktimeve të legjislacionit në fuqi. Për sa më sipër MIE sjell në vëmendje të ERE-s se ajo nuk ka miratuar zgjerimin e kapacitetit të hidrocentralit ekzistues Këlsyrë, i privatizuar nga ana e shoqërisë “Këlcyra 2020” sh.p.k..
- Në vijim, ERE me shkresën nr. 2038/12 prot., datë 22.08.2025, ka njoftuar shoqërinë se është vënë në dijeni të qëndrimit të MIE-s si më sipër, si e tillë, përpara se të vijoje me rishikimin e vendimit nr. 197/2025, shoqëria duhet të depozitojë qëndrimin e saj dhe dokumentacionin që disponon në lidhje me sa më sipër.
- Po ashtu, me shkresën nr. 2038/13 prot., datë 22.08.2025, ERE i është drejtuar MIE-s duke i bërë me dije se ERE tashmë ka vijuar me licencimin e shoqërisë, sipas kushteve përkatëse dhe në kushtet kur ERE është vënë tashmë në dijeni të korrespondencë të zhvilluar me shoqërisë dhe MIE-s dhe qëndrimit të kësaj të fundit, do të vijohet me rishikimin e këtij vendimi.
- Me shkresën e protokolluar në ERE me nr. 2038/14 prot., datë 28.08.2025, shoqëria është shprehur se, në referencë të ligjit nr. 43/2015, MIE jep autorizime nëpërmjet procesit konkurrues vetëm për ndërtimin e kapaciteteve të reja gjeneruese, ndaj në rrethanat që shoqëria ka privatizuar një HEC ekzistues, nuk i nënshtrohet këtij procesi.
- Me shkresën nr. 2038/15 prot., datë 09.09.2025, ERE i është drejtuar sërish MIE-s, duke vënë në këtë shkresë për dijeni dhe shoqërinë, dhe dukë kërkuar nga MIE qëndrimin e saj në lidhje me sa parashtruar nga shoqëria me shkresën e sipërcituar, përpara se ERE të vijojë me rishikimin e vendimit.
- Së fundi, me shkresën nr. 5331/4 prot., datë 09.10.2025, protokolluar në ERE me nr. 2038/16 prot., datë 14.10.2025, MIE është shprehur se qëndrimi i saj mbetet i pandryshuar nga ai i shprehur më parë, duke evidentuar se në referencë të përcaktimeve të pikës 2, të nenit 49, të ligjit nr. 43/2015, i ndryshuar, miratimi për ndërtimin e kapaciteteve prodhuese të energjisë bëhet nëpërmjet procesit konkurrues, sipas përcaktimeve të legjislacionit në fuqi.
- Me marrjen e qëndrimit të MIE-s, një dokument që nuk disponohej përpara se ERE të vijonte me vendimmarrjen përfundimtare për licencimin e shoqërisë, vlerësohet se jemi në rrethanat e rishikimit të vendimit të Bordit nr. 197/2025, ku në pikën 6 të tij është parashikuar se *ky vendim*

është objekt rishikimi, në rast të plotësimit/mosplotësimit të kushteve të pikave 2, 3, 4 dhe 5 të këtij vendimi dhe në rast të depozitimit të akteve të ndryshme nga ato që kanë shërbyer për marrjen e këtij vendimi.

- Vlerësohet të sqarohet se fillimi i pasojave juridike të vendimit të Bordit të ERE-s nr. 197/2015, sa i përket fillimit të ushtrimit të së drejtës për prodhimin e energjisë elektrike, ishte i kushtëzuar me pajisjen nga ana e shoqërisë edhe depozitimin në ERE nga ana e saj të lejes së përdorimit të burimit ujor cka përbën një dokument thelbësor për ushtrimin e kësaj veprimtarie. Duke qenë se nuk rezulton të jetë depozituar nga ana e shoqërisë ky dokument, ky kusht ndalues është aktualisht në fuqi dhe licenca për prodhimin e energjisë elektrike nuk e ka filluar ende efektshmërinë e saj.

Për sa më sipër, në referencë të përcaktimeve të nenit 77 e në vijim të ligjit nr. 44/2015 “Kodi i Procedurave Administrative i Republikës së Shqipërisë”, në lidhje me hetimin administrativ, për sa parashikuar dhe në pikën 6 të vendimit të bordit të ERE-s nr. 197, datë 15.08.2025, vlerësohet të fillohet procedura për rishikimin e këtij vendimi, me qëllim vlerësimin e fakteve dhe rrethanave të nevojshme që lidhen me aplikimin shoqërisë për licencim në veprimtarinë e prodhimit të energjisë elektrike dhe objektin e kërkesës së këtij aplikimi.

Për gjithë sa më sipër, bordi i ERE-s,

Vendosi:

1. Të fillojë procedurën për rishikimin e vendimit të bordit të ERE-s nr. 197/2025, datë 15.08.2025 “Mbi licencimin e shoqërisë “KËLCYRA 2020” sh.p.k. në veprimtarinë e prodhimit të energjisë elektrike nga HEC “Klisyrë”, me kapacitet prodhues 2 MW”.
2. Drejtoria e Licencimit dhe Autorizimeve, të njoftojë shoqërinë “KËLCYRA 2020” sh.p.k. dhe Ministrinë e Infrastrukturës dhe Energjisë për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI